
■ GLOBAL FORUM

Svizra sut squitsch

(rtr) La Svizra n'è betg en ina situaziun empernaivla. Ensemen cun 13 auters stadis sco la Botsvana, il Libanon ed il Panama furma ella la glisch cotschna en dumondas da trasparenza e dal barat d'infurmaziuns da taglia. Quai tenor il Global Forum da l'OECD. L'organisaziun dumbra oz 120 stadis commembers ch'èn tuts s'obligads da respectar ils standards internaziunals da taglia. Quant serius ch'ils stadis fan quai controllescha il Global Forum regularmain. E qua ha la Svizra en in'emprima fasa survegnì malas notas.

Tenor *Fabrice Filliez*, il manader da la delegaziun svizra a l'inscunter a Jakarta, creschia il squitsch. Tant pli ch'ils emprims 50 stadis vegnan uss a pudair serrar giu la segunda e davosa fasa da l'examinaziun da lur sistem da taglia, di Filliez.

Ristg da vegnir sin glista naira

Cun la publicaziun dals emprims rapports finals vegnian ils stadis che n'hajan anc betg finì l'emprima fasa da l'examinaziun a vegnir en il focus. Uschia era la Svizra. Oravant tut perquai che betg tut ils 50 stadis vegnan ad esser cuntents cun la valitaziun dals experts dal Global Forum e vegnan perquai a far attents sin las mancanzas da la Svizra. Cun quai creschia per la confederaziun il ristg da vegnir sin ina glista naira. Ina glista che pudesse lura puspè vegnir duvrada per giustifitgar sancziuns economicas cunter la Svizra, di Filliez.

Impurtant saja perquai da preschentar ils progress che la Svizra haja fatg en ils secturs ch'il Global Forum haja crititgà avant dus onns. Era sche naginas da quellas pretensiuns sajan anc vegnidadas ademplidas cumplainmain. Qua stoppia il parlament anc far sia lavur, chatta Filliez.

In'emprima decisiun vegn il cussegl naziunal il pli probabel a prender durant la sessiun d'enviern che cumenza glindesdi. La lescha per l'agid uffizial en dumondas da taglia duai vegnir modifitgada uschia che persunas pertutgadas vegnan infurmadas pir suenter che lur datas èn vegnidadas surdadas ad in auter stadi.

Act da suveranità

Quai na saja dentant betg da chapir sco in dar suenter, in ceder da la confederaziun avant il Global Forum, accentuescha Fabrice Filliez. Tgi che pretendia quai n'enconuschia betg la realità da las relaziuns internaziunals. S'adattar a standards internaziunals reconuschids saja in act da suveranità che fetschia part da la defensiun activa dals interess da la confederaziun.

Filliez spera perquai ch'il Global Forum reconuschia las stentas da la Svizra e che quella possa l'onn proxim entschaiver cun la segunda fasa da las examinaziuns. Uschia che la confederaziun vegnia finalmain stritgada da la glista dals stadis betg cooperativs.